

EM2017/42

19. oktober 2017

Michael Rosing, løsgænger

**Qanoq iliorluta mingutsitsineq annikillisarniarlugu eqqaanermut atortut puussiat plastikiusut atorunnaariartortinnissaannut suliniuteqassanerluta apeqquteqaat aallaavigalugu Inatsisartunut oqallisissiasatut siunnersuut.**

(Inatsisartunut ilaasortaq Mimi Karlsen, Inuit Ataqatigiit)

Microplastik pillugu apeqquteqaat aallaavigalugu oqallinneq.

Siunnersuuteqartumut qujavunga qulequtaq manna soqutiginarluinnartooq pingaaruteqartorlu qaqqimmagu.

Isumaqataaqqissaanngilangali oqartoqarmat puussiat eqqaaviit ajornartorsiutini annersaasut. Paasisakka naapertorugit allunaasaqutit, pisiniarfiliutit puussiat, ballonit, timmisarsiutit imassa, qoorortuut imassa, kiisalu uulianut dunkit ajornartorsiutaanerupput puussianut eqqaavinnut naleqqiullugit. Eqqaaviit puussiat eqqortumik ikuallanneqarunik imatorsuaq ulorianartorsiortitsisussaannngillat. Apeqqutaaginnartumik ikuallaaviit tamakkersortinneqarlutik ikuallaasarnissaat.

Apeqqutaavorli sumi aallartissanersugut. Politikeritut pisussaaffeqarpugut isumagissallugu eqqagassat katersorneqartarnissaat eqqortumillu aserorterneqartarnissaat. Amerlanerpaani pisariaqarpoq ikuallaaviit sakkortusillugit ikuallaasarnissaq. Suliaq ingerlareerpoq taamaakkaluartorli soqutiginnassaaq paasissallugu qanoq siuariartoqarsimatiginersoq.

Taava qissimissinnaavagut piniarfiliutit puussiat inerteqqutaalersissanerlugit. Uanga nammineq pisiniarfiliutit annoraamerngit atulernikuuakka. Taamaakkaluartorli puigorsimariaraangakku puussiarsisarpunga. Tassani arlalinnik periarfissaqarpugut. Pisiniarfiliutit puussiat inerteqqutaalersissinnaavagut. Utertittagannngortissinnaavagut qularnaarumallugu sapinngisamik imassat amerlanerpaat utertikkumallugit, allunaasaqutit eqqarsaatigalugit aamma taamaasiorsinnaavugut aamma uuliamut dunkit eqqarsaatigalugit. Aamma sulissutiginnavaarput inuit allaanerusumik ileqqoqalersinnissaat.

Uanga upperineruara suliat assigiinngitsut ataatsikkoortikkutsigit. Isumaqarpunga pisiniarfiliutit puussiat pisiarinissaat ukiualuit ingerlanerini inerteqqutaalersissagigut. Isumaqarpunga ataatsimoorluta

sulissutigisariaqaripput inuit allaanerusumik ileqqoqalersinnissaat. Aamma isumaqarpunga politikkeritut maligassiuisariaqartugut. Taamaattumik imatut siunnersuuteqassanga.

Pinngortitami illoqarfinnut avinngarusimasumi nassaassat ilagaat ballonit sinnikui. Illoqarfimmi ballonit takusartakkagut amerlanerpaasarpur qineqqusaarnerni, partiit tamarluinnarmik meeqqanut balloninik agguaassisarmata. Pimoorullugu isumaqarutta microplastik peertariaqarlugu taava aallarniutigalugu immitsinnut neriorsorsinnaavugut qinersisartugullu, qineqqusaartoqassatillugu kingorna ballonit atoqqinniarnagit.

Kina peqataarusuppa?

Qujanaq oqallinnermut soqutiginartumut.